

ያቆቤይ ጸፊዳ ኪታ ጊደ ቆፋ

ሃይሲ ያቆቤ ኪታዚ ኣሲ ሃች ሃች ዳና ዱሳ ጊሻሰ ዮቲዛዝ ጊዲሺን ኢዚ ጸፊቲዳይ ዱማ ዱማ ዳሬን ላሌቲ ዱዛ ታማኔ ናምኡ ኢሰራኤሌ ዛርኬታሳ፤ ሃሳ ጸፊዳዳይ ኦኒ ኦ ኤራቴሉ ኦሶን ፔይሻና ኦጌ ጊሻሰ ኣማኒዛ ኣሳ ሞኮ ጊሻሲኔ ኣማሌ ሎኤፋና ኦጌ ቤሲዛ ዮኦታ ቆንጨሲዛ ሃሳያታ ለሚሶራ ቤሴስ። ማንቆቴላ ጊሻሰ፣ ፓጩ ጊሻሰ፣ ሎኦ ኣማሌ ጊሻሰ፣ ቃንጌቴላ ጊሻሰ፣ ኣማኖ ጊሻሲኔ ሎኦ ኦሶ ጊሻሰ ኢንጻርሳ ኢታቴላ ጊሻሲኔ ሎኤቴላ ጊሻሰ፣ ኣቶ ኤራቴላ ጊሻሰ ኢሶይ ኢሳራ ኦሻ ጊሻሰ፣ ኦቶሬቴላ ጊሻሲኔ ኣሽኬቴላ ጊሻሰ፣ ሃራ ኣሳ ቦላ ፒርዳ ጊሻሰ፣ ጨቄቴላ ጊሻሰ፣ ዳንዳያ ጊሻሲኔ ዋሳ ጊሻሰ፣ ኣማኒዛይቲ ኦፋናስ ቤሲዛ ሚሻታ ሁኤን ሁኤን ጸፊዳስ።

ሃ ኪታዚ ኣማኖይ ኣማኖ ዱሳን ኦሴታና ቤሲዛ ኦጌታ ሎኤላ ቆንጨሲስ።

ሃ ማጻፋይ ኦይኪዳ ኩሜላ ቆፋ

ጌሎሶ 1:1

ኣማኖኔ ኣቶ ኤራቴሉ 1:2-8

ማንቆቴሲኔ ዱሬቴሉ 1:9-11

ፓጩ 1:12-18

ጸሳ ቃላ ሲዩዲ ኦሶን ፔይሾ 1:19-27

ኦጌይ ባይንዳ ማዶ ማዶንታ ማላ ኢሜቲዳ ቆፊሶ 2:1-13

ኣማኖኔ ኦሶ 2:14-26

ኣማኒዛዴኔ ኢዛ ሃሳያ 3:1-18

ኣማኒዛዴኔ ሃይሳ ሃ ኣላሜዛ 4:1—5:6

ዱማ ዱማ ሃኖታ ጊሻሰ ኢሜቲዳ ዞሬ 5:7-20

¹ ጸሳ ኦሳንቻኔ ዬሱስ ኪርሰቶሳ ኦሳንቻ ጊዲዳ ያቆቤፔ ቢታ ቦላ ላሊቲዳ ታማኔ ናምኡ ኮቻታስ ሳሮቴሉ ኢንቴስ ጊዶ።

ሜቶኔ ፓጩ

2 ታ አሻቶ! አንቴ ቦላ ዱማ ዱማ ዋዬይ ጋኪኮ ሄሳ ወርሲ ኡፋይሳን ቆዲቴ።

3 ጋሶይካ አንቴ አማኖ ፓጩቴሉ አንቴሰ ዳንዳያ አሚዛይሳ አንቴ ኤሬታ።

4 አንቴ ዳንዳያን ሚኒ ኤቃናይሲ አንቴሰ ኢሲ ሚሺካ ፓጮንታ ኩሚላ አሲኔ ዋሶይ ባይንዳይታ ጊዳና ማላ ኦሶ።

5 አንቴ ጊዳፌ ኦናሰካ ኤራቴሉ ፓጪኮ ኦናካ ሌቆንታ ባ ኪያቴላራ ኡባሰ አሚዛ ጸሳ ዋሶ፤ ኢዛዴሰካ አሚታና።

6 ጊዳ ኦቴን ሲጄይ ባይንዳ አማኖን ዋሶ፤ ጋሶይካ ሲጂዛዴይ አባ ቃሲዛ ዳምባላ ጫርኮ ማላ።

7 ሄሳዴይ ጎዳፔ አይኮካ ዴማና ጊዲ ቆፖፎ።

8 ሄሳዴይ ናምኡ ቆፋን ኦይኬቴዲ ባ ቢዛ ኦጌ ቦላ ያኔ ሃ ጊዛ አሳ ማላ።

9 ካሴ ዚቃ ዱሳን ዲዛዴ ጸሲ ጾቄ ሂሰታና ጊሻሰ ኡፋዬቶ።

10 አሳ ዱሬቴሉ ማታ ጪሻ ማላ ቆካና ጊሻሰ ዱሳን ጾቄ ጊዳዴይ ጸሲ ኢዛ ዚቄ ሂሰቲኮ ኡፋዬቶ።

11 አርሼይ ጸጊዲ ማታ ሹሊሴሰ፤ ማታ ጪሻይካ ሹሊሰ፤ ኢዛ ሎኤቴሉካ ጳዬሰ፤ ሄሳሶካ ዱሬይ ሃች ሃች ዳቡርሳን ዲሺን ኢዛ ዱሬቴሉ ጳዬሰ።

12 ፓጩን ሚኒ ኤቄዳዴይ ኢዚ አንጃቲዳዴ፤ ጋሶይካ ኢዚ ፓጩራ ኤቄቲሺን ጸሲ ባና ዶሲዛይታሰ አሚዳ ሂዶታ ዴኦ አኪሊሌ ኢዚ ኤካና።

13 ኦኒካ ፓጩቲዛ ጊዲኮ ታና ጸሲ ፓጩሰ ጎፖ፤ ጋሶይካ ጸሲ አሴ ኢታን ፓጩና፤ ኢዚ ኦናካ ፓጪ ኤሬና።

14 ጊዳ ኦቴን ኢሲ ኢሲ አሲ ፓጩቲዛይ ባርካ ባ ኢታ አሞ ካሊሼኔ ባላቲሼ ፓጩቴሰ።

15 አሞይ ቃንላቲዲ ናጋራ ዬሌሰ፤ ናጋራይካ ዲጪዳፔ ጉዬ ሃይቆ ዬሌሰ።

16 ታ ሲቆ አሻቶ! አንቴ ባሌቶፍቴ።

17 ሎኦ አሞቴሉኔ ኩሚላ አንጃይ ወሪ ቦላ ሳሎ ፖኦታ አዋፔ ዋዴቴሰ፤ ኢዛ አቻን ያኔ ሃ ዩዩዛ ኤሻይካ ዴና።

18 ኦ ኢዛ ሚጴቴላሰ ኮይሮ ባይራታ ጊዳና ማላ ባ ሼኔኒኔ ባ ቱማ ቃላን ኦና ዬሊዴሰ።

ሲዩዳይሳ ኦሶ

19 ዶሴቲዳ ታ አሻቶ! ሃይሳ ዩሺ ቆፒቴ፤ አሲ ወሪካ ሲያናሰ ኤሶቶ፤ ሃሳያሰኔ ሃንቆሰ ኤሶቶ።

20 አሳ ሃንቆይ ጸሳ ዲሎቴሉ ኦሌና።

21 ሄሳ ገሻሰ ቱናቴሌኔ ዳልጊዳ ኢታቴሌ ኢንቴፌ ኬሲ ዩጊዳ ኢንቴ ሾሞፖ አሻናሰ ዳንዳይዛ ኢንቴ ጊዶን ቶኬቲዳ ቃላ አሽኬቴላራ ኤኪቴ።

22 ቃላይ ገዛይሳ አሊቴ አቲን ሜላ ሲሰ ጸላ ሲዩዛዳንታ ጊዲዲ ኢንቴርካ ኢንቴና ባሌሶፍቴ።

23 ቃላ ሲዩሼ ሲዩዳ ቃላይ ገዛይሳ ኦሶንታዳይ ባ አይፌሶ ማሰቶቴራ ጼሊዛ አሳ ማላ።

24 ባና ጼሊ ቤኢዲ ቤሰ፤ ኢዚ አይ ሚሳቲዛኮ ሄራካ ባሊቲቸሰ።

25 ጊዶ አቲን ባና ጌሺዛ ሎኦ ዋጋ ጼሊ ቤኢዲ ኢዛን ሚኒዛዳይ ባ ሲዩዳይሳ አሊዛዳይኔ ባሎንታዳይ ኢዚ ባ ኦሶን አንጃቲዳዳ ጊዳና።

26 ባ ዶና ናንታ ባርካ ባ ዋዚና ባሌሊሼ ታ አማናይሰ ገዛዳይ ባርካ ባና ባሌሌሰ፤ ኢዛ አማናይካ ሃዳ አማና።

27 ጸሳ አዋ ሲንላን ኢታቴሌ ባይንዳ ሎኦ አማናይ ኢያኔ አዋይ ሃይቂዳ ናይታ፤ ኢሰታ አዚናቲ ሃይቂዳ ማጫሳታ ሜቶቴቲሺን ማዶኔ ሃይሳ አላሜዛ ቱናቴላፌ ባና ናሳ።

2

ኦጌይ ባይንዳ ማዶ ኮሺና

1 ታ አሻቶ! ኢንቴ ቦንቸቲዳ ጎዳ ዬሱሰ ከርሰቶሳ አማኒዛይታ ጊዲዳ ማላ አሴ ቤሶንታ ኦጌራ ማዶፍቴ።

2-3 ዋርቃ ዪች ቢራዴን አሊዲ ሎኦ ማይኦ ማይኢዳ አሲ ኢንቴ ሸቂዛሶ ዪኮ ሄሳሶካ ቂታ ማይኦ ማይኢዳዳይ ሄ ሸቂዛሶዛ ዪኮ ቃሴካ ሃራ ቂታ ማይኦ ማይኢዳ ማንቆ አሲ ጌሊኮ ሎኦ ማይኢዳይሳ ዱማ ቦንቸ ቦንቸዲ፤ «ኔሰ ቤሲዛ ሎኦ ኡቲዛሶ ሄሳ ቤያ» ጊዲ ሃንኮ ማንቆዛ ቃሴ፤ «ኔ ሄን ሄሳን ኤቃ፤ ዋይኮ ሃ ያ፤ ታ ጋርሳን ወጌን ኡታ» ኢንቴ ገኮ።

4 ኢንቴ ኢንቴ ጊዶን ቤሶንታ ማዶ ኦሌታ ጊዴኬቲ? ቃሴካ ኢንቴ ኢታ ቆፋን ኦይኬቲዳ ኢታ ፒርዳ ፒርዲዛይታ ጊዴኬቲ?

5 ታ ሲቆ አሻቶ! አኔ ሲዩቴ፤ ኢሰቲ አማናን ዱሬታ ጊዳና ማላ ጸሲ ባና ዶሲዛይታሰ ሂዶታ ኢሰታሰ አሚዳ ካዋቴላ ኢሰቲ ላታና ማላ ሃይሳ ሃ አላሜዛን ዲዛ ማንቆታ ዶሪቤኔ?

6 ኢንቴ ቃሴ ማንቆታ ካወሺታ፤ ኢንቴና ዋዪሲዛይ ዱሬታ ጊዴቴኔ? ኢንቴና ፒርዳሶ ጎቺዛይ ኢሰታ ጊዴቴኔ?

7 ኢንቴናን ጸይጌቲዳ ቦንቸ ጸሳ ሱንላ ዘገርዛይቲ ኢሰታ ጊዴቴኔ?

8 ጌሻ ማጽፋን፤ «ኔ ላጌ ኔ ሁኤ ማላ ሲቃ» ጌቴቲ ጸፊቲዳ ካዎ ዋጋ ኢንቴ ፖሊኮ ሎኦ ኦፊታ።

9 ኢንቴ ቤሶንታ ማዶ ማዲኮ ናጋራ ኦፊታ፤ ዋጋ ሲንገላንካ ኢንቴ ዋጋ ዬዲዳዴ ጌዲ ቆዴታና።

10 ጋሶይካ ዋጋ ኡባ ፖሊዛዴይ ቃሴካ ዋጋፔ ኢሲኔይን ቋዴቲዛ አሲ ኡባካ ሞሪዳዴ ማላ ቆዴቲሰ።

11 «ላይማቶፓ» ጌዳዴይ ኢዚካ ዛሪዲ፤ «ዎጵፓ» ጌዴሰ። ኔ ላይማቶንታ አጊኮካ ኔኒ አሰ ዎጵኮ ዋጋፔ ኦዲዳዴ ጌዳሳ።

12 ኢንቴ ሃሳያ ሃሳይሼ ዋይኮ ኢሲ ሚሽ ኦፊሼ ኢንቴና ጸሊሲዛ አሳ ማላ ጌዲቲ።

13 ጋሶይካ ማርንታይ ዉሪካ ማርይ ባይንዳ ፒርዴታና፤ ማርይ ፒርዳ ጸኔሰ።

አማኖ ኦሶ

14 ታ ኢሻቶ! ኢሲ አሲ ታሰ አማኖይ ዴሰ ጊኮ ቃሴ ኦሶን ቤሶንታዴ ጌዲኮ ኢዛ አይ ማዳኔ? ሄሳ ማላ አማኖይ ኢዛ አሻኔ?

15-16 አኔ ቆፒቲ፤ ኢሲ አሻይ ዋይኮ ኢሲ ሚቺያ ማይኦይ ዋይኮ ሚዛይሲ ባይንዳ አጊኮ ኢንቴፊ ኢሳዴይ፤ «ኢንቴ ሳሮን ቢቲ! ኢንቴና ሜሳፎ! ካሊቲ!» ጊኮ ኢሰታ አሾሰ ኮሺዛይሳ አሞንታ አጊኮ አይ ማዳኔ?

17 ሄሳሶካ ኦሶይ ባይንዳ አማኖይካ ባሰ ሃይቂዳይሳ።

18 ጊዶ አቲን ኢሳዴይ፤ «ታሰ ኦሶይ ዴሰ፤ ኔሰ አማኖይ ዴሰ፤ ኔኒ ኔ አማኖ ኦሶፔ ሻካዳ ታና ቤሳ፤ ታ ቃሴ ታ አማኖ ኦሶን ኔና ቤሳና» ጊኮ

19 ኔ፤ «ኢሲ ጸሲ ዲዛይሳ አማናሳ» ሄሲካ ሎኦ፤ ዳይዳንፋቲካ ሄሳ ማላ አማኔቲሲኔ ኬሂ ኮኮሬቲሰ።

20 ኔኖ ኤያዞ! ኦሶይ ባይንዳ አማኖሰ ጎአይ ባይንዳይሳ ኤራናሰ ማርካ ኮያይ?

21 ኦ አዋ አብራሃሜይ ባ ና ዪሳቃ ያርሺዛሶዛ ቦላ ሺሺዳ ዋዴ ኦሶን ጸሊሲቤኔ?

22 ሄሳን ባ አማኖዛ ኦሶራ ጋፊ ኦፊዛይሳ ኔ ቤያሳ፤ አማኖይካ ኦሶን ፖሊቲዴሰ።

23 «አብራሃሜይ ጸሰ አማኒዴሰ፤ ሄ አማኖይ ኢዛሰ ጸሊሎቲፋን ቆዴቲዴሰ» ጊዛ ማጸፋ ቃላይ ፖሊቲዴሰ፤ ኢዚካ ጸሲ ዶሲዳዴ ጌቴቲዴሰ።

24 ሄሳ ገሻሰ አሲ አማኖን ጸላ ጊደንታ ኦሶንካ ጸሊዛይሳ ኢንቲ ቤቶታ።

25 ሄሳላካ ላይማን ዲዛ ኤራኣባ ከቲቲ ቢዳ አሳታ ሞካ ኤካዳ ሃራ ኦጌራ ሞይዛ ዬዲዳ ገሻሰ ባ ኦሶን ጸላቤኬ?

26 ሼምፖፌ ሻኬቲዳ ኣሾይ ሃይቄል ጊዲዳ ማላ ኦሶፔካ ሻኬቲዳ አማኖይ ሃይቄላ።

3

ባ ዶና ናሳ

1 ታ ኢሻቶ! ኢንቲፌ ዳሮቲ አሰታማሬታ ገደፔቶ፤ ጋሶይካ ኦ አሰታማሬ ገዲዳይቲ ኣጼላ ፒርዳ ኤካናይሳ ኢንቲ ኤሬታ።

2 ኦ ወሪካ ዳሮ ሚሻን ቆጶቶሰ። ሃሳያን ቆጶቶንታይ ዲኮ ኢዚ ባ አሳቲል ሎኤል ናጋናሰ ዳንዳይዛ ኩሜላ አሳ።

3 ኦኒ ፓራታ አዛዛናሰ ቢጸላ ባርሲዲ ኦ ኮዪዳ ማላ ኢሰታ አዛዘሰ።

4 ዎይኮ ኣኔ ማርካቤታ ጽሊቲ፤ ኢሰቲ ኣይ ጊታታኔ ጫርኮን ሱጌቲ ቢዛይታ ገዲኮካ ማርካቤ ሳጊዛይይ ቄሪ ላፋ ሳጊዛ ሚሻራ ባ ኮይዛሶ ኤፌሰ።

5 ሄሳላካ አሳቲላ ጋርሳን ኢንጸርሲ ጉል ገዳ ኡታዳ ጊታ ዎልቃማ ኦቶሮ ኦቶሬታወሰ፤ ቄሪ ታማይ ጊታ ዎራ ዎሰቲ ጹጊ ዳይሲዛኮ ኣኔ ዩሺ ቆፒቲ።

6 ኢንጸርሲካ ባ ባጋራ ታማ ማላ፤ ቃሴ ኦ አሳቲላ ጊደን ዲዛ ኢታ አላሜ። አሳቲላ ወርሳ ቱኒሳወሲኔ አሳቲላ ቦላ ታማ ጉጃወሰ፤ ባሰካ ጋናሜ ታማን ጽጌታና።

7 ሜሄ፡ ዶኣ፡ ካፎታ፡ ቢታ ቦላ ጎሼቲዛይታኔ አባ ጊደን ዲዛ ሜጴቲላታ ኡባ ኣሲ ሃራና ዳንዳይሰ፤ ኢሰቲካ ሃራቲዳ።

8 ገደ ኣቲን ኢንጸርሰ ሃራናሰ ዳንዳይዳይ ኦኒካ ዳና፤ ዎጲዛ ማርዜይ ኢዚን ኩሚዳርኔ ኢዛ ሼምፓ ኤኮንታ ኢታ ሚሻ።

9 ኦኒ ኦ ኢንጸርሳይራ ጎዳኔ አዋ ኣንጀሰ፤ ኢዚንካ ጸሳ ለሚሶን ሜጴቲዳ አሳ ናይታ ዛሪዲ ቃንጎሰ።

10 ኣንጀይኔ ቃንጌል ኢሲ ዶናራ ኬዜሰ። ታ ኢሻቶ! ሄሲ ሄሳሶ ሃናናሰ ቤሴና።

11 ኢሲ ፑልቶ ኦላፌ ማልኦ ሃሊኔ ጫሞ ሃሊ ፑልቲ ኤሪዜ?

12 ታ ኢሻቶ! ባላሴ ጌቲቲዛ ሚሊ ዎጋራ ኣይፌ ዎይኮ ዎይኔ ሚሊ ባላሴ ሚላ ኣይፌ ኣይፋናሰ ዳንዳይዜ? ሄሳላካ ጫሚዛ ሃላፌ ማልኢዛ ሃሊ ቤታና ዳንዳይና።

ናሞኡ ቆሞ ኤራቴል

13 ኢንቴ ጋርሳፌ አከካራ ዲዛ ኤራ ኣሲ ኦኔ? ኤራይ ዲዛ ጊዲኮ ኣኔ ባ ኦሶ አሽኬቴላኒኔ ኣቶ ኤራቴላራ ባ ሎኦ ዲሳን ቤሶ።

14 ቃሴ ጨሞኔ ቃናቴይ፥ ኢንቴና ጸላ ደሲዛ ሃኖይ ኢንቴ ዎዚናን ዲዛ ጊዲኮ ኦቶሬቴል ኢንቴሰ ሲዬቶፎ፤ ቱማካ ካዶፍቴ።

15 ሂኒ ማላ ኤራቴላያ ሳሎቴ ጊዲኩ፤ ሂና ቃሴ ቢታፌ፥ ኣሾቴኔ ጸላኤፒሶ!

16 ቃናቴይኔ ባርካ ባና ሲቆይ ዲዛሶን ዋሶይኔ ኢታ ኦሶይ ወሪ ዴሰ።

17 ሳሎቴ ጊዲዳ ኤራቴላያ ጊዲኮ ኮይሮ ጌሻ፤ ጉዬፒካ ሳሮቴል ደሲዛሮ፥ ዳንዳይዛሮ፥ ኤሮ ጊዛሮ፥ ማሮቴልኔ ሎኦ ኣይፌይ ኩሚዳሮ፤ ቃሴ ዋርዶ ማዶንታሮኔ ኡሎን ጌኔይ ባይንዳሮ።

18 ሳሮቴል ደሲዛ ኣሳቲ ሳሮቴል ዜሪዲ ጸሎቴላ ኣይፌ ማጽቴሰ።

4

ኢንቴናቴላ ጸሳስ ሃሪሲቴ

1 ኢንቴ ጊዶን ዲዛ ኦላይኔ ኦሺ አዋፔ ዪዴ? ኢንቴ ዎዚናን ዲዛ አሞቴላፌ ዴንዲዳ ኦላ ጊዴኔ?

2 ኢንቴ አሞቴታ ሺን ዴሚኬታ፤ ኢንቴ ኣሰ ዎጴታኔ ኬሂ አሞቴታ ሺን ዴማና ዳንዳይኬታ፤ ኢንቴ ኢንቴ ጋርሳን ኦዬቲዛ ጊሻሳኔ ኦሌቲዛ ጊሻሰ ቃሴ ዎሶንታ ጊሻሰ ኢንቴሰ ኢሚቴና።

3 ኢንቴ ኢንቴ ኣሾ ኡፋይሳናሰ ኢታ ቆፋን ዎሲዛ ጊሻሰ ዎሲዳይሳ ኢንቴ ኤኬኬታ።

4 ኢንቴኖ ላይማቲዛይቶ! ኣላሚራ ሲቄቴል ጸሳራ ሞርኬቴል ጊዲዳይሳ ኤሬኬቲ? ሄሳ ጊሻሰ ሃይሳ ኣላሚዛራ ሲቄቴል ኮይዛይ ወሪካ ጸሳስ ሞርኬ።

5 ዎይኮ ጌሻ ማጸፋ ጊዶን፥ «ኦናን ኢዚ ኣይሲዳ ኣያናይ ኦ ኢዛይታ ጊዳና ማላ ዳሮ አሞቴሰ» ጊዛይሲ ኢንቴሰ ፎ ማላ ጊዳ ሚሳቲዜ?

6 ጊዶ ኣቲን ኢዚ ባ ኪያቴል ኦሰ ጉጂ ኢሚሰ፤ ማጸፋይካ፥ «ጸሲ ኦቶራንቻታራ ኤቄቴሰ፤ ኣሽኬታሰ ጊዲኮ ባ ኪያቴል ኢሚሰ» ጊዳይ ሄሳሳ።

7 ሄሳ ገሻሰ አንቴና ጸሳሰ ሃሪሲቴ፤ ዳቡሎሳራ ኤቁቴቴ፤ ኢዚ አንቴፌ ባቃታና።

8 ጸሳኮ ሸቂቴ፤ ኢዚካ አንቴኮ ሸቃና፤ አንቴኖ ናጋራንቻቶ! አንቴ አንቴ ኩሼ ጌሺቴ፤ አንቴኖ ናምኡ ቆፋን ቃጺዛይቶ! አንቴ አንቴ ዋዚና ጌሺቴ።

9 ዳርሲ ቆፒቴ፤ ሙዞቴቴ፤ ዬኪቴ፤ አንቴ ሚቻይ ዬሆን፤ ኡፋይሳይ ቃሴ ሙዞቴላን ሲሞ።

10 ጎዳ ሲንላን አንቴ አንቴና ካወሺቴ፤ ኢዚ አንቴና ቶቁ ቶቁ ሂሰታና።

11 ታ አሻቶ! አንቴ አንቴ ጋርሳን ኢሶይ ኢሳ ሞቶፒቴ፤ ባ አሻ ሞቲዛዴይኔ ባ አሻ ቦላ ፒርዲዛዴይ ዋጋ ቦላ ኢታ ሃሳዬሲኔ ዋጋ ቦላ ፒርዴሰ፤ ሂሰቲኮ ኔኒ ዋጋ ቦላ ፒርዲዛዴ ኣቲን ዋጋ ናገዛዴ ገዳካ።

12 ዋጋ ዋሊዳዴይኔ ፒርዲዛዴይ ኢሳዴ ጸላ፤ ኢዚካ ቆይሳናሲኔ ኣሻናሰ ዳንዳይዛዴ፤ ገዳ ኣቲን ኔ ላጌ ቦላ ፒርዲዛዴይ ኔ ኦኔ?

ጨቁታናሰ ቤሴና

13 «አንቴ ሃቶ ዋይኮ ዋንቶ ሃኖ ሃ ካታማዮ ዋይኮ ሂኖ ሂ ካታማዮ ኑ ባና፤ ሂሰቲዲ ሂን ኢዚን ኢሲ ላይሰ ኡታናኔ ዛልኢ ዋቋሳና» ገዛይቶ! ኣኔ ሃ ሲዪቴ።

14 ዋንቶ ሃናናይሳ አንቴ ኤሬኬታ፤ አንቴ ሼምፖይ ኢዛ ኣዜ? አንቴ ጉላ ዋዴ ኣይፊን ቤቲዲ ቆይዛ ሃላ ፔንታ ማላ።

15 ሄሳ ጋናቴ፡ «ጎዳ ሸኔ ገዲኮኔ ኑ ፓጸ ዲኮ ሄሳካ ሃይሳካ ኦላና» ጋናሰ አንቴሰ ቤሴሰ።

16 ሃኢ ገዲኮ አንቴ ኦቶሬቴላን ጨቁቴታ፤ ሄሳ ማላ ኦቶሬቴሊ ወሪካ ኢታ።

17 ሄሳ ገሻሰ ሎኦ ገዲዛይሳ ኦላናሰ ቤሲዛይሳ ኤሬሼ ኦሎንታዴሰ ናጋራ ገዳና።

5

ዱሬታሰ ኢሜቲዳ ዞሬ

1 ሂሰቲኮ አንቴኖ ዱሬ ኣሳቶ! ኣኔ ሲዪቴ። ቡሮ አንቴ ቦላ ጋካና ሜቶዛ ገሻሰ ዬኪቴ፤ «ወ! ወይ» ገ ዋሲቴ።

2 አንቴ ሃርይ ቡቂዴሰ፤ አንቴ ማይኦካ ቢላይ ሚዴሰ።

3 አንቴ ዋርቃይኔ አንቴ ቢራይ ሺይዳሰ፤ ሄ ሺይዳይሲካ አንቴ ቦላ ማርካቴሲኔ አንቴ አሾ ታማ ማላ ጸጌሰ፤ ዋዴ ወርሴላሰ ሚሼ አንቴ ሺሺዳታ።

4 አንቴ አንቴ ዋዚናን ዋሊቴ፤ አንቴ ካል ማጺሼ ፔይዳይታሰ ኢሰታ ዋልቃ ዋጋ አንቴ ቃንጾንታ ኣጊዳ ጊሻሰ አንቴ ቦላ ዋሲሼ አንቴ አቻን ዴቴሰ። ካል ማጺዛይታ ዋሶይ ኡባ ዳንዳይዛ ጎዳ ሃይላን ጋኪዳሰ።

5 አንቴ ቢታ ቦላ ኢሻሎኒኔ ኣልኤቴላን ዳኢዳታ፤ አንቴ ዋዚና ሹካሰ ጳኪዳ ማሄ ማላ ዋዳሲዳታ።

6 አንቴ አንቴናራ ኤቄቶንታ ጸሎ ኣሳታ ቦላ ዋርዶ ዋሊዲ ዋዳዳታ።

ሜቶ ዳንዳዮ

7 ሄሳ ጊሻሰ ታ አሻቶ! ጎዳይ ሃ ያና ጋካናሰ ዳንዳይቴ፤ ጎሼ ጎዪዛዳይ ቢታይ ሎኦ ካሊ ካጸና ጋካናሰ ዋኒ ዳንዳይዛኮ ኮይሮ ኢራኔ ወርሴላ ኢራ ኢዚ ዋሰቲ ናጊዛኮ ኣኔ ኣኬከቴ።

8 አንቴካ ሄሳሳ ዳንዳይቴ፤ አንቴ ዋዚና ሚንሊቴ፤ ጎሶይካ ጎዳ ዩሳ ጋላሲ ማቲዳሰ።

9 ታ አሻቶ! አንቴ አንቴ ጊዶን ዘጊሬቶፍቴ፤ አንቴ ዘጊሬቲኮ አንቴ ቦላ ፒርዳታና፤ ፒርዳናዳይ ሄኮ አንቴ ፔንጌ ቦላ ኤቄዳሰ።

10 ታ አሻቶ! ጎዳ ሱንላን አንቴሰ ዮቲዳ ናቤታ ዋዬቴሊኔ ኢሰታ ዳንዳያ አንቴሰ ለሚሶ ሂሰቲ ጸሊቴ።

11 ዳንዳያን ጌንጨዳ ኣሳታ ኑ ኢሰታ፡ «ኢሰቲ ኣንጃቲዳይታ» ጊ ቆዲዛይሳ አንቴ ኤሬታ። ኢዮቢ ዋኒ ዳንዳይዳኮ አንቴ ኢዛ ጊሻሰ ሲዪዳታ። ጎዳይ ኢዛ ወርሴላን ኣይ ኦሊዳኮ አንቴ ቤዪዳታ፤ ጎዳይ ኣሳሰ ኬሂ ሚሼቲዛዳኔ ማሪዛዳ።

12 ሃራፔካ ታ አሻቶ! ሳሎን ጊዲን ዋይኮ ሳኣን ጊዲን ዋይኮ ኣይ ሚሻንካ ጫቆፍቴ፤ «ኤ» ጋናሰ ቤሲዛ ሚሽ ጊዲኮ፡ «ኤ» ጊቴ። «ኣካይ» ጋናሰ ጊዲኮ፡ «ኣካይ» ጊቴ፤ ሄሳፌ ሃራ ጊኮ አንቴ ቦላ ፒርዳታና።

ኣማኖ ዋሳ

13 አንቴ ጋርሳን ሜቶቲዛ ኣሲ ዲዜ? ዲዛ ጊዲኮ ኢዚ ዋሶ። ኡፋዬቲዛዳይ ዲዜ? ዲዛ ጊዲኮ ኡፋይሳ ማዛሙሬ ዬጸ።

¹⁴ እንቲ ጊደን ሳኬቲዛ አሲ ዲዜ? ዲኮ ዋሳ ኬፋ ጨማታ ደይሳ፤ ኢሰቲካ ጎዳ ሱንፋን ዛይቲ ኢዛ ቦላ ቲይዲ ኢዛሰ ዋሴቶ።

¹⁵ እማኖን ዋሲዳ ዋሳይ ሃርጊዳዴ ፓፋና፤ ጎዳይካ ኢዛ ዴንፋና፤ ኢዚ ናጋራ ኦሊዳዴ ጊዲኮካ ጸሲ ኢዛ ማራና።

¹⁶ ሄሳ ጊሻሰ እንቲካ እንቲ ጋርሳን ኢሶይ ኢሳራ እንቲ ናጋራ ፓጾቲቲ፤ ፓጾና ማላ ኢሶይ ኢሳሰ ዋሴቲ፤ ጸሎ አሳ ዋሳይ ዋልቃራ ዴሰ፤ ዋልቃማ ኦሶካ ኦሌሰ።

¹⁷ ኤላሲ ኦ ማላካ አሳ፤ ኢዚ ኢራይ ቡኮንታ ማላ ሚንሊ ዋሲን ቢታ ቦላ ሄሹ ላይሊኔ ባጋ ጋካናሰ ኢራይ ቡኪቤና።

¹⁸ ቃሴካ ዛሪ ዋሲን ኢራይ ሳሎፔ ቢታ ቦላ ቡኪዴሰ፤ ቢታይካ ካላ እሚዴሰ።

¹⁹⁻²⁰ ታ ኢሻቶ! እንቲፌ ኢሳዴይ ቱማፔ ባሌቲን ሃራ አሲ ኢዛ ዛሪኮ ሄሳ ዋዚናን ዋሊቲ፤ ናጋራንቻ ኢዚ ባሌቲዳ ኦጌፔ ዛሪዳዴይ ሄሳዴ ሸምፖ ሃይቆፔ ኢሸሲኔ ኢዛዴ ናጋራ ዳርዛካ ካሚሰ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b